

Gyaez Gij Feihdauh Ranzmbanj

心心念念的家乡味道

□ Maknam hoiz

Vunz baihnanz maij gwn faenj. Youq Cenzcough Yen youq, gyanghaet baez singj, doq aiq nyouq raen gij heiq hom faenjhunzyouz. Doengxhaet, byaijhaeuj aen diemq iq henzgai, heuh aeu vanj faenj ndatfwdfwd ndeu naengh roengzma menhmenh gwn, ngoenzmoq vunz Cenzcough couh daj vanj faenj ndeu hainduj.

Baenzlawz Guh

Faenjhunzyouz Cenzcough, mbouj ndaej noix faenjsaeq、hungz-youz、raemxdang duhhenj aeuq ndokmou.

Gij boughloh guh faenj mbouj genjdanh, daj haeux bienqbaenz faenj, gij raemx guh faenj caemh gig youqgaenj. Raemx mbouj ndei, faenj caq okdaeuj heih soi, miz heiqsoemj. Haeuxciem cimq raemx, seizhah cimq ngoenz ndeu, seizdoeng cix aeu cimq song sam ngoenz. Deq haeuxbieg cimq dumx doh, couh vaxok swiq cengh, muh baenz giengh, raenx guh baenzngauq luenzled, couh cuengqhaeuj raemxgoenj bae cawj. Deq baihrog cug baihindaw lij maqhuz ndip couh vaxhwnj cuengqhaeuj raemxcaep bae. Cib faencung gvaqbae couh dwkhaeuj aen gihdajgyaux gyauxyinz. Ndaej le gaenx guh baenz diuz loq luenz ndeu dwkhaeuj aen gihcaqfaenj bae, gu raemx goenj ndeu couh do youq baihlaj, faenjsaeq youq ndawgu cawj faencung ndeu couh vaxhwnj langh caep. Gij faenj ngamq caqok haenx, raezrang、saeqset、yinzfwd、mbouj heih soi.

Cienq hungzyouz caemh gig gaujniemh gij goengfou cangh-guhfaenj. Youz ndat lai roxnaeuz mbouj gaeuq ndat、cienq nanz lai roxnaeuz cienq mbouj gaeuq, gij feihdauh caeuq gij saek hungzyouz couh mbouj deng. Lwgmanh hoengz gvaq raemx baez cawj, dawz ceh ok, gya gyu muh baenz mba. Nda rek cuengq youzduh, youz ndat couh raix mbalwgmanh, ceuj yaep ndeu doq dem raemx, aeu ndau mbouj dingz, aiq cienq baenz haj roek diemj cung cijndaej. Deq gij gienghlwgmanh mbouj nem fageanj, hungzyouz couh cienq baenz lo. Gij hungzyouz guh ndaej ndei haenx hoengzfwg rongheingx、youh hom youh rang.

Raemxdang duhhenj aeuq ndokmou cix dwg aeu ndokdoengzmou、duhhenj、hing、daeuhseih、maklozhan daengj liuh gya raemx bae cienq.

Faeg nohmou soi, le, coux vanj gya liuh、gya di raemxdang caeuq gyaux, aeu raemxdang goenjbyoetbyoet haenx cung haeujbae, nohmou couh cug lo. Neix dwg aeu bae boiq faenj.

Gij faenj ngamq caq ndei haenx aeu raemxgoenj baez romx couh cang vanj, dwk nohsoiq、coeng caeuq byaekhom, daek beuz raemxdang rwed haeujbae, gajlaeng caiq rwed hungzyouz, vanj faenjhunzyouz ndeiawj、homfwd ndeu couh guhbaenz lo. Hwnjdaiz doq nip gaemz faenj haeujbak, caiq boep gaemz raemxdang he, faenj nyangqnyed、duhhenj biqbubq、raemxdang homfwd singjed, cix mbouj manh lai, youh sangjbak youh sek. Hawj vunz gwn vanj ndeu youh siengj gwn vanj daihngeih dem.

Cienzgangj

Faenjhunzyouz Cenzcough lij miz aen goj ndeu. Cienzgangj, Cenzcough miz boux lwghauq heuhguh Dangz Gozcungh. Bi ndeu seizdoeng, daxmeh de baenzbingh, gwnhaeux mbouj roengz. De heiq

raixcaix, couh hwnjyeng gouz bouxsien Cangzngoz coengh de. Cangzngoz son de aeu sam cungj doxgaiq manh (lwgmanh、hing、ho) laeng Cenzcough guh hungzyouz ma boiq faenj, neix couhdwg faenjhunzyouz. Cungj faenj neix sangjbak ndeigwn, gwn sat aenndang raejrubrub. Daxmeh de gwn le sam baez, bingh couh ndei lo. Saeh neix cienz daengz gwnzbiengz diegde, gyoengqvunz cungj haenh Dangz Gozcungh hauqswnh, youh bae ranz de hag baenzlawz guh faenj. Faenjhunzyouz couh yienghneix cienz daengz seizneix.

Doiq vunz Cenzcough ma gangj, faenjhunzyouz couhdwg gij feihdauh ranzmbanj. Daj baihrog ma daengz Cenzcough, gwn vanj faenj-hungzyouz ndeu, couh roxnyinh caen ma daengz ranzmbanj.

(Cenzcough Yen Yungmeiz dij、Luz Yizyauj hawj doz)



▲Faenjhunzyouz Cenzcough.